

**Lettre du Comite International pour les Victimes de la haine ethnique, massacres et génocide au président de la République et au gouvernement**

**Cette lettre écrite en Kinyarwanda est un appel à tout le monde, pour que la culture de l'impunité cesse. Le document prône la tolérance, l'égalité et la cohabitation pacifique entre les ethnies. Il annonce le comportement que devrait adopter tout politicien et tout parti politique, afin de rendre égaux tous les citoyens. L'Association qui publie ce document se décrit comme une coalition d'autres associations visant une justice pour tous.**

**IBARUWA YA ASSOCIATION Y'ABABUZE ABABO MURI 1994 NA NYUMA  
YAHU  
YANDIKIYE PEREZIDA WA REPUBLIKA Y'U RWANDA  
NA GOUVERNEMENT**

Nyakubahwa Perezida wa Repubulika y'u Rwanda?

Impamvu : Gusaba ko hashyirwaho commission irwanya ubuhezanguni (extremisme), urwanganu, na Génocide, kandi abantu b'amoko yose babuze ababo muri 1994 na nyuma y'aho ibyabo bigakurikiranwa bakarenganurwa, abitwara nk'aho bagamije kugarura genocide nabo bagakumirwa ibi bigakorwa ku moko yose.

Twebwe Association ihagarariye izindi association zihuriwemo n'abahuye n'amarorerwa yaranze u Rwanda muri iyi myaka ishize, kubera ibibazo bimaze iminsi bibaho, tubandikiye tubasaba Nyakubahwa ko mwashyiraho Akanama gashinzwe kurwanya ubuhezanguni (extremisme), urwanganu na genocide mu banyarwanda kandi kagakurikirana n'iby'abantu babuze ababo nta kurobanura ubwoko.

-Turasaba kandi ko mwashyiraho akanama gakurikirana uburyo hari abahazanguni bagitsimbaraye ku buhutu hakiyongeraho n'abatsimbaraye ku bututsi nabo bafite gahunda mbi bagaragaraho imyitwarire ivugwaho kuba baba mu nzira igamije kugarura genocide.

Ntabwo turwanya ubuhutu n'ubututsi kuko buri wese afite uburenganzira bwo kwitwara icyo ashaka icyo turwanya ni ukubikandagiza abandi bataricyo cyangwa ukajya muri gahunda zigamije kugirira nabi abandi.

Kurwanya aba extremists ntibigomba kwitiranwa no kunyuranya ibitekerezo muri politiki ahubwo kuba mu mashyamba anyuranye imyumvire no kudahuza imirongo ya politiki nibyo birwanya ubu extremists.

Turasaba ko hakwitabwaho no kwigisha kuko ubaye extremists arimbura abantu n'ibintu yageza aho byanze bikunze nawe akirimbura ubwe akarimbura n'abo yita abe. Dusabye buri kintu cyose kigira uruhare mu kuzimiza abantu ko ibyo bintu byakwitabwaho. Dusabye amashyamba FPR n'ayandi bifatanije guhaguruka bagahana abahazanguni bayagaragaramo akenshi bakaba ari nabo bagaragara mubakora ibyaha n'abatuma habaho kuniga demokarasi itangazamakuru n'ibindi bizamo gufata ibyemezo bisumbanya abanyarwanda hagamije guhisha amakosa yabo bakoze batatumwe n'ubutegetsi.

Tuzirikaneko abo ba extremistes ari nabo babonekamo ibyemezo bifatwa bisa n'ibihima leta kuburyo umutegetsu mukuru atabikurikanyeye ashobora kugira isura mbi we azi ko akoresha uko ashoboye kose ngo ibintu bibe byiza.

-Tubandikiye tubasaba ko kurwanya aba extremistes mwabishyira ku mwanya wa mbere kuko icyo byirengagijwe hagumaho demokarasi ku izina gusa mu bikorwa bikaba ibindi, hagumaho ubwoba mu baturage.

Iyo ubuhezanguni bwirengagijwe ibintu bigenda nabi, nta kintu gishoboka uretse kubaka agatsiko gahora kikanda kugeza aho gasandara.

-Ushobora kugira imigambi myiza ntugire icyo ugeraho kuko ufite aba extremistes bagukoma mu nkokora.

-Dusabye ibihugu by'inshuti z'u Rwanda hamwe n'ibindi nk'Ubwongereza, USA, n'ibigize "Union Européenne" n'ibindi bifasha u Rwanda hamwe n'abandi bahafite amaradiyo na za Ambassade cyangwa izindi services kutareba inyungu z'igihe gito bakita kugufasha u Rwanda kurushaho mu rwego rwo kurwanya ubuhezanguni kuko ibizongera bikaba bizabarwa no ku bihugu byabo bahagarariye kandi bakwiriye gutera inkunga bagafasha leta mu kureshyeshya abanyarwanda bese ndetse n'ibyo bitangamakuru byabo nabyo bikabigiramo uruhare runini bikagaragaza ko nta muntu n'umwe uhezwa. Ni muri urwo rwego imbaraga zabo zitagomba kwirengagiza gutera inkunga buri wese wo muri Afrika y'ibiyaga bigari ugamije kubaka igihugu mu nzego mu nzego zose.

Dusabye ko icyo bihugu byose byakubaha abapfu bese (ni ukuvuga Abanyarwanda n'abandi bese nta kurobanura ubwoko) bishwe mbere ya 1994, muri 1994 na nyuma ya 1994, kandi bigaharanira ko icyo migiririre icika burundu.

Twongeye kubasaba kuzirikana no gufasha cyane abazize genocide yakorewe Abatutsi muri 1994 bakanafasha ko bitazasubira.

-Dusabye kandi u Rwanda kutazaba akarima k'urwigiro (expérimentation) z'ibyo buri wese aziko bidakwiriye ikiremwa muntu cyo muri iki kinyejana mu nzego zose z'ubuzima n'ubutegetsu by'Abanyarwanda.

-Turabasaba kandi ko abatera ubwoba bwa za mandat z'abategetsu zizakurikira babihagarika hamwe n'abazitira système bakagabanya kuko bibaye bityo byatuma gahunda nyinshi zihazaharira.

Ntabwo igihugu kigomba guhera mu bwoba bwa campagne (iyamamaza) izaba mu myaka icumi hagomba ubwisanzure 100% iby'amatora bikazagira igihe cyabyo ariko ibi ntibigomba kubangamira imikorere y'amashyamba ariho n'andi yasabye kubaho hamwe n'izindi nzego ziharanira politiki muri gahunda yazo ya buri muni.

-Muri urwo rwego dusabye itangamakuru nyarwanda gukomeza gufungura amarembo kandi abagaragayeho ubuhezanguni (extremistes) no gukumira ibitekerezo by'abandi banyarwanda bigakemurwa. by'umwihariko turasaba ubwisanzure busesuye mu itangamakuru rya leta n'iryigenga kandi rikarushaho

kwemera impaka za buri Munyarwanda niyo yaba adashyigikiye umurongo wa politiki w'igitangamakuru runaka kandi abahanga n'abashakashatsi bafite imigambi myiza bakarushaho guhabwa uruhare no gutangaza ibitekerezo byabo.

Abanyabwenge b'umutima mwiza barakenewe ngo bamurikire igihugu bisanzuye kuko ni igihe cyabo. Kuri iyi ngingo buri munyabwenge wese ntiyagombye kurindira ko baza kumushaka, bakwiriye kwibwiriza bakegera itangamakuru n'ushatse kubangira bakamwamagana.

Ikosa ntibagomba kuryegeka ku itangamakuru kuko bigaragara ko rigenda rigerageza uko ibihe bigenda bihinduka.

-Dusabye ibihugu bishyigikira leta zo mu biyaga bigari kongera gusuzuma cooperation zabo bakareka gushyigikira groupe na leta bisenya ubuzima bw'abaturage kuko ibyo bashyigikiye hamwe bisenya n'ahandi.

Ibyo bimaze igihe bigaragara mu Burundi no muri Congo. Bakwiriye guhagurukira gushishikariza uwo babona muri izo nzira kuyoboka inzira yubaha ubuzima n'ubwisanzure bw'abaturage.

-Dusabye ko harebwa uburyo hajya hashyirwaho abategetsu batari "Baringa" cyangwa batinya gufata ibyemezo ngo kuko nta jambo bagira nk'uko abamaze iminsi basezera babitangaza. Tukaba dusaba n'abakora gutyo kwegura kuko biri mu byicisha abanyarwanda. Mwe mukora gutyo nta gaciro muzigera mugira mu mateka y'u Rwanda.

-Dusabye abaregwaho ibyaha by'intambara kuruhande rw'u Rwanda kwemera guhanwa kandi Abanyarwanda bakabumva kuko mu butabera nicyo kubaka igihugu bisaba. Ku ruhande ruturuka abakurikiranwa basanzwe bazwiho ubutwari bundi busanzwe ibyo ntibizabubahanaguraho ariko bagomba guhanwa.

Kubireba ihana ry'ibyaha, abagomba kugawa si abakoze ibyaha bonyine ahubwo ni abari mu batekererezaga amashyamba kuri politiki y'igihe kirekire igomba kugenderwaho abaramiye igihugu cyayogojwe n'abicanyi muri 1994 nta nyungu n'imwe yari ikenewe mu kwica Abahutu n'abandi Banyarwanda, kuko ubutegetsu bwari ubwabo ntakibirukansa.

Twongeye gusaba abakurikiranwaho amarorerwa ko batagomba kurakarira abiciwe ahubwo abagomba kurakarirwa n'abashinzwe gutekereza ishyamba ngo batange inama zikwiye kuko buri wese yagombye kureba kure ntatume ibibi nk'ibyo bikorwa. Iyo wemeye abawe bakiyanduza ntabwo uba ubakunda.

Twongere tuzirikane ko ibi byaha byakozwe bireba isi yose ku buryo iyo wanze kubihana abandi barabihana kandi hari n'igihe batangira kubihana utakiriho noneho bikarushaho kuba umwanda.

Ni ukuvuga ko bidashobora guhishwa igihe cyose ndetse iyo bitinze byivangamo ibindi bigahindura isura n'uburemere. Kubihisha, kutabihana no kubuza kubivuga ni ubushishozi buke cyane. Abatanga inama zimeze gutyo n'abizeza ibidafashije

bakwiriye kureka ibinyoma ahubwo bagafasha gukemura iby'ubwo bwicanyi kuko ari uburyo bwo kuruhura abanyarwanda.

Iyo iki kibazo kivuzwe dusabye bamwe bajya bayoboka inzira yo gutoteza abiciwe bari mu gihugu cyangwa hanze kubihagarika.

-Dusabye ko mu rwego rwo kunganira ubugenzacyaha n'ubucamanza leta yakwemera gushyiraho système yemera ubugenzacyaha bwigenga kandi bugahabwa ubwisanzure kugirango bwunganire ubwa leta.

-Gushyiraho "principe 0 mort, zero impunité" buri wese wishwe ibye bigasobanuka kandi ababigizemo uruhare bagahanwa.

-Turifuza ko démocratie isesuye yahera mu mashyaka ya politiki, umuntu utanzweho umutegetsu akaba yatowe kumugaragararwo mu ibanga habayeho gupigana kandi nta buryo buziguye bwakoreshejwe n'abifuza ko ari runaka utorwa.

-Dusabye leta kwitondera ikibazo cy'amoko ntikigirwe indakorwa. Ahubwo kigomba kuganirwaho kandi ntihagire ubwoko runaka buhatirwa ba runaka mu buryo buziguye n'ubutaziguye ataribo babyihitiyemo. Buri wese akwiriye guhabwa ubwisanzure no kunganya n'abandi amahirwe ku byiza by'igihugu.

-Dusabye Perezida wa Republika, nk'urwego rw'igihugu, gukomeza kuba hejuru ya byose kandi akarenganura bese akumva na bese. Ibi bigomba no gukomeza kugaragarira mubahuye n'amarorerwa y'ubwicanyi mu rwego rwo kubumva bitabwaho.

-Mu migirire yo gutanga ibitekerezo turasaba kubaha "droits intellectuels" kuburyo kubohozwa no kwigana ugamije kwangiza bicika buri wese akubahirwa ibitekerezo bye yatanze mu kubaka igihugu hamwe n'ibikorwa bye igihe bitarenganya abandi.

-Turifuza ko buri wese (nta kurobanura) wayoboye igihugu ahabwa icyubahiro nko mu bindi bihugu kuko hari ikimwaro mu mateka ku rungano rwatubanjirije kubona u Rwanda rushajisha nabi cyane abaruyoboye bese (abasaza bishwe cyangwa bagaragarika bandavura).

-Gushyiraho système irwanya ubuyobozi burema "one Man Show"(umuntu kamara) kuko igihe azimiyemo azimirana n'igihugu ibintu byose bigahinduka nabi.

-Gutekereza ubuyobozi bushyiraho ibikorwa n'ibindi biranga igihugu bitazakenera guhindurwa uko bibonetse n'ugiyemo asimburira undi kubera ko uwabikoze yirebye kugiti cyeye.

-Dusabye mwe za groupe n'abantu ku giti cyanyu mukora mu ishyamba runaka kwemera mugakorera ishyamba rimwe nta mpu nyinshi mwambara kuko bituma hamwe hari ibyo mwangiza mu izina ry'abatagaragara. Dusabye bamwe babiharaho bakiyoberanya bagasenya ibikorwa by'abandi cyangwa bakajya guca intege uwo badahuje ibitekerezo byitwa ko bakorerwa umurongo basanzwe bazwimo kandi ataribyo.

-Dusabye kureka imigirire ya kera y'uko amateka y'u Rwanda yagiye aba ay'abafite ubutegetsi bonyine ayabantu basanzwe bakayakubura bikaba ari nayo mpamvu amateka y'u Rwanda usanga yuzuye inkuru mbi ziba zaragiye ziranga ubutegetsi bakirengagiza amateka ya rubanda rwa giseseka kandi ari meza.

-Dusabye abatsimbaraye ku buhutu n'ubututsi bwabo ku buryo buziguye cyangwa butaziguye ko ari uburenganzira bwabo ariko ko bagomba kuzirikanako hari abandi banyarwanda batibonamo kandi bikaba ari uburenganzira bwabo kubaho banganya amahirwe n'abandi kandi badahezwa ku byizwa by'igihugu ku buryo byakabaye byiza bose bubahanye nk'abanyarwanda n'ushimishijwe no kwigumanira Ubunyarwanda bwonyine nawe akagira umwanya mu bandi.

-Dusabye leta y'u Rwanda gukomeza gahunda y'uko buri Munyarwanda aho ari hose yahoza umutima hafi y'igihugu cye igihe abishaka kandi abari mu Rwanda n'abari ahandi bakanganya agaciro kubyiza by'igihugu kandi urwangano mu bakora politiki rukavaho kuko Abanyarwanda bagomba gusabana mu bwisanzure ibyo baba bakora byose.

-Kubireba ubucamanza ibya Gacaca bikwiriye kwigwa neza kuko twumva ari ikimwaro guha umuturage uburenganzira bwo guhana itsembabwoko rireba isi yose igihe uwo muturage atabyigiye kandi ashonje na leta ikaba ibyemera ko ashonje ndetse hakiyongeraho n'izindi ngorane nyinshi zimurenze ku giti cye no hagati ye n'imibanire ye n'abandi.

Bigaragara ko bidahwitse mu mateka kuba umuturage yarahawe ubutegetsi n'ingoma y'abicanyi ubwo bubasha bwo gufata gufunga no kwica akabumarisha abantu noneho leta iyikurikiye ije gukosora nayo ikongera igafata wa muturage ufite ibibazo by'insobe utazi gusoma, ukamuhereza na none bwa bubasha bwo guhana, gufunga, gufungura no guca imanza ku bibazo bye bwite no ku bya bene wabo na bagenzi be.

Uburyo icyaha cyakozwemo ni nabwo bukoreshwa mu kugihana. Hakurikijwe n'uburyo bushya bwa lobbyng, igitsure n'ibindi bikoreshwa bikagamburuzwa n'abacamanza babyigiye ntabwo umuturage ashobora kubyikuramo n'ingorane yikoreye.

Ibya Gacaca bikwiriye kwigwa abicanyi bagahanwa ariko ntibisige n'ikimwaro cy'amateka bigaragaza ko koko Abanyarwanda bakigendera ku buryo butari kure y'abasekuruzwa abantu bataragira amajyambere n'ubumenyi isi igezeho.

-Kuri ubu abantu bamwe bari ku ruhande rundi muri genocide yabaye mu 1994, bararegwa ubwicanyi bwabaye muri 1994 na nyuma y'aho ndetse n'ibihugu by'inshuti y'u Rwanda n'ibindi buri cyose nta gihakanako abantu bishwe kandi buri cyose gifite aho gihagaze ku bireba ubucamanza. Byaba rero bibabaje icyo kibazo cyongeye kikabikwa mu bibazo bitigeze bibonerwa umuti.

N'uwaba abyifuza atyo byaba ari imibare mibi cyane kuko uko ikibazo gishobora gukemurwa uyu muni aribyo byoroshye kurusha uko cyazinzikwa kikazahurudukana inkubiri runaka ibihe bitakiri ibi tubona. Igikwiriye kuzirikanwa n'abafite ababo bakoze ayo marorerwa ni uko abo bavugwa badakwiriye gutereranwa cyangwa ngo bamburwe ubumuntu n'agaciro bigeze kugirira igihugu bataragwa muri ayo

marorerwa, ariko na none nabo bagomba kuba intwari bagahanwa kugirango bibe urugero rwiza n'ubushake kuko niko bigenda muri politiki no mu bucamanza iyo ugamije kubaka igihugu udahimana kandi ureba kure.

Iyo ingoma yemeye kwicara hejuru y'amarorerwa byanze bikunze isoza igihe cyayo nabi. Ibi rero ntawabyifuriza leta y'u Rwanda kuko ni iya twese kandi byoroshye gukemura icyo kibazo.

-Kubireba association, twongeye kwizeza Abanyarwanda ko tuzaguma mu murongo wo kureshyeshya Abanyarwanda bese bakagira amahirwe amwe kandi ntituzigera turwanya leta tuzakomeza gufasha uko dushoboye kose mu kubaka u Rwanda rubereye bese no gufasha mu gukemura ibibazo bibangamiye igihugu. Ni byiza kubaka igihugu abacyo bese bakareshya mu mahirwe kandi bese bagafatwa kimwe. "Comite International pour les Victimes de la haine ethnique, massacres et genocide" yemera genocide yakorewe Abatutsi mu 1994 hamwe n'Abahutu bayiguyemo kandi ikarwanya n'abayikoze.

NB: Tuributsa ko iyi association ikorana na za associations zigenga zivugira buri wese wabuze uwe ziri hirya no hino hatarobanuwe ubwoko n'igihe icyaha cyakorewemo n'abakoze icyo cyaha. Akababaro kose kagomba kwitabwaho. Abayihagarariye ni ingeri zose, harimo abarokotse interahamwe, abiciwe ababo nyuma ya 1994 na mbere y'aho.

Association yongeye kwifatanya n'abandi Banyarwanda bagiye bicirwa abantu ku mpande zombi. Iyi association ibereyeho no kurwanya urwanganu no gufasha abantu bahura narwo bazira iby'amoko n'ibindi. Association irwanya ubuhezanguni "extremistes" ikigisha n'ibana ryiza rishingiye kukubahana no kunganya amahirwe mu Rwanda no muri Africa y'ibiyaga bigari.

RUTAYISIRE Boniface, Perezida w'association y'abanyeshuri bo muri Université zo mu Buringi akaba na Directeur General (Administrateur) du «Comité International pour les Victimes de la Haine Ethnique, massacres et génocide»  
Rue Charles Martel 32, à 1000 Bruxelles Belgique.  
Tél : 00(32) 472267071  
Bitangajwe na service ya Information ya CIVHE

NB : Nk'uko byasabwe n'abanyamuryango ba za association zateguye iyi nyandiko, byemejwe ko iyi nyandiko itangazwa n'undi wese ubishatse, gukora photocopie no guhindura mu zindi ndimi biremewe.